



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 7

Bruno Fernandes-i otsü tasen ka yangluogo

WHO-i DR Congo, Uganda nung Ebola tashidak 'global health emergency' sangdong



VOL. XXIII ISSUE NO. 214 (ADOK 214) DIMAPUR TENTONÜ (MONDAY) MONUPII (MAY) 18, 2026

₹ 5.00

Sweden-i PM Modi nem tematiba sempet agütsü

New Delhi, May 17, 2026 (Agencies): Deobarnü Prime Minister Narendra Modi nem Sweden nung Royal Order of Polar Star, Commander Grand Cross agütsüogo.

Royal Order of the Polar Star ya Sweden-i sorkar tekolak nem agütsüba sempet tulutiba lir. Iba ya PM Modi indang 31 buba global honour lir.

PM Modi-i anogo ananü semdangtsü atema Sweden tongogo. Deobarnü Gothenburg Airport nung Swedish Prime Minister Ulf Kristersson-i pa

pela agizüka liasü.

Iba sülen Modi aser Kristersson na senden ka amendang trade, technology, defence, aser tanga tongti sectors asoshi jembio.

Royal Order of the Polar Star ya 1748 nungi agütsü tenzük aser sempet ya Sweden mesüra Swedish nung taginüba asoshi inyakertem ajiteta tushir.

PM Modi-i 2018 nung Sweden semdanga liasü aser iba ya mezüngbuba India-Nordic Summit nung adentsü atema aoba liasü.

KIM-i mokdang ayongba ghonda 48 atsülanger

Imphal, May 17, 2026 (Agencies): Senapati district nung Kuki-Zo nung pua aliba chioktsü atema rongshia Kuki Inpi Manipur (KIM)-i Kuki-Zo tesemtem ajunga mokdangba atsülangba osang metetdaksüogo.

Deobarnü Kangpokpi district headquarters nung lungkak aitba sentong tulu ka agiba sülen iba lemte agiba osang metetdaksü.

Lungkak aitertemi tatemzükba kecha melii civilians 14 chioktsü aser Kuki-Zo arogo

lennir asem tepsetba atema temeten meshia takhangba agütsüogo.

Iba sentong ya Kuki Inpi Manipur ketdangsuba kübok ayongzük aser Kuki-Zo civil society organizations aikati shilem agi.

Iba sentong agiba sülen Committee on Tribal Unity (CoTU) office nung Kuki-Zo civil society organizations senden ka amen aser idangji parnoki mokdang ayongba ano ghonda 48 atsülangtsü bangjemtep.

Kohima nungi RDF waste material bener yokogo



Kohima, May 17, 2026 (TYO): Kohima Municipal Council Dumpsite Legacy Waste Remediation Project nungi mezüngbuba Refuse Derived Fuel (RDF) waste material tangaleni yokogo.

Iba sentong nung Kohima Municipal Council (KMC) Deputy Chairperson Thenusou Sekhose den Assistant Director, SBM, Urban Development Department, High School Ward Councillor Kelhousenuo Khruomo, KMC ketdangsurtem aser staff tem aden.

Solid Waste Management Rules of India den putepa RDF waste material indang 11 tons tashi UMISO Mootang, Thangskai, Khelerihat, East Jaintia Hills, Meghalaya-i

yokogo. Iba ya scientific processing aser utilization atema Free of Cost material category kübok yok.

Iba legacy waste remediation initiative ya SBM-U 2.0 kübok inyaker aser legacy waste 40,250 metric tons belentsü aser dumpsite land ali acre 1.4 shi ka azüngtettsü atema iba mapa ya tenzükogo.

Iba mapatong ya joko tatembangleni arur aser iba ajanga Kohima Municipal Council (KMC) ajanga scientific waste management, environmental protection, aser public health asoshi tenangzükba agia inyakba sayur.

KMC-isa sensotem dang jana mashii meindoktsü aser jana bendenba tesem wazükba ayutsü mepishia metetdaksüogo.

UNC-i Manipur nung 'economic blockade' tenzük



Imphal, May 17, 2026 (Agencies): United Naga Council (UNC)-i Manipur nung Naga nung aliba tesemtem nung aliba National Highways nung inter-district economic blockade asütsü metetdaksüogo. Working Committee, UNC-i

May 14 nü Manipur sorkar dang ghonda 24 tsüngda Kuki telungpur teloktemi pua aliba Naga nung 20 tarak meketi chioktsü atema shidi ka zülua liasü. Parnok ya Leilon Vaiphei village aser Sapermaina Kuki village nung apuba liasü.

Iba shidi agütsüba sülen May 15 anepdang nisung 20 nungi 14 chiok saka pastor ana dena tanüngba nisung 2 ano mengutet lir. State sorkari May 16 nü nikongdang 2:00 ako tashi search & rescue operations inyaksü atema mapang meshilok aser mapang anaben tashi apuloktsüogo ta UNC-i Deobarnü metetdaksü.

Mapang apulokjaka tanüngba civilians meküzüki lir aser state agencies-i parnok chioktsü atema mapa meinyakteter ta UNC-isa metetdaksü.

"Iba tensa nung ajemdaker onoki Manipur nung Naga tesemtem nung aliba National Highways nung Inter-District Economic Blockade tenzük aser iba ya Naga nung pua alirtem mechiok tashi alitsü" ta UNC Media Cell sangdong ka nung metetdaksüogo.

NHAK nung International AIDS Candlelight Memorial amung

Kohima, May 17, 2026 (TYO): Deobarnü College of Nursing, Naga Hospital Authority Kohima nung International AIDS Candlelight Memorial ayonga agiogo.

"HIV aser AIDS atema loktii aniba movements rongnung International AIDS Candlelight Memorial ya tejentiba aser

sentong tulutiba lir" ta District AIDS Control Officer, DISHA, Dr. Chibenthung Kithan-i ashi.

"Iba anogo nung Candlelight Memorial agiba ya tamaitü ka dang masü saka iba ajanga HIV aser AIDS maparen pusemba aser aria bilemtsüba sayur" ta pai ashi.

Taküm iba anogo asoshi omenji "Light the Legacy:

Remember. Advance. Act" lir aser iba ajanga AIDS dak sendakba shirang balala ajanga asürtem tushir, activists, healthcare workers aser caregivers ajanga shilem agiba ajiteter, aser bendanga amshiba, senzükba amshiba anema maneni inyaksü ayongzük ta Dr. Chibenthung-isa metetdaksü.

Zeliangrong United Committee-i Naga civilians chioktsü akhanger

Imphal, May 17, 2026 (Agencies): Manipur nung Zeliangrong kintem atema tongti telok Zeliangrong United Committee (ZUC)-ia Konsakhul village nungi pur aoba Naga civilians trok mechiokra timtem tulu ajurutsü ta metetdaksüogo.

"Kuki lennirtemi hostage exchange asütsü shidangba atema telangzükba magütsür. Pua alirtemji Rev. Dr. Manu Thiumai,

Phenrongwi Thiumai, Phenrilung Chawang, Kaliwangbou Abonmai, Pastor Kenpibou aser Dilip Thiumai nung lir" ta ZUC president Maibon Phaomei-i ashi.

May 13 nü Kangpokpi district kübok Leilon Vaiphei village nungi Naga civilians 20 pur aoba rongnung par trok ya densema lir. Iba atema jembitepa arur nisung 14 chiokogo saka tanüngba nisung 6 mengutet lir. Osang

angazükba agi Senapati district nunga Kuki nung 14 pua lir.

Kuki nung kinungertemi parnok ajak chioktsü mepishiogo. "Onoki politics mesüra mangatettep nungi mepishir masü saka parnok tsüraburtem, kinungtsü-kinungbotem aser tanurtem tekangshi aser tetsübu nungi iba temepishiba ola yoker" ta Kuki nungeri metetdaksüogo.

KSO Delhi & NCR ajanga tiyazü prokshir: NSCN (IM)

Dimapur, May 17, 2026 (TYO): Kuki Students' Organisation (KSO) Delhi & NCR ajanga kin o kin tsüngda mepetmesü tuluba akümtsüsa osang prokshiba aitsür ta NSCN (IM)-i metetdaksüogo.

KSO Delhi & NCR ajanga Manipur nung tang ajurua aliba tensa indang sangdong ka agütsüba aitsür. Parnoki kin o kin tsüngda temulung melemtep adoktsü meranga kuli tejangja melii tai tongloksür ta MIP, NSCN/GPRN sangdong ka nung ashi.

KSO Delhi & NCR ajanga

kiralongraba aser ozüng alema prangpong amer inyaksangshiba indang onüktem prokshir saka iba ya kin ajunga majung ama sayutsü atema tiyazü osang prokshiba lir ta MIP-isa ashi.

Iba kaketshir teloki olulu prokshitsü aser public anisatsü atema tatalokba kulitem meyipsa osang prokshir. Shitakba agibo public sabangtem aser kaketshir teloktemibo tebilemtsü khuret bena inyaksüla, yimjung asoshi noktaksüla, chichiba jembitsüla aser lokti putepa alitsüsa inyaksangshitsüla ta NSCN (IM)-isa metetdaksüogo.

Kin mesüra teloktemi tiyazü, kin anema aser mepetmesü adoktsüsa osang prokshiba anentsüla. Iba maparen maneni inyakra national azha kübok ozüngi melaba ama mapa inyaksü ta parnokisa tekümdangtsü olen ka shiogo.

NSCN (IM)-isa India ketdangpurtem, civil society organisations, kaketshir teloktem aser media dang külen tsütsü dang shir osang meprokshtsü aser yimjung, temeten aser tensa süngiemtsü atema kin ajak asoshi külemi inyaksü ayongzükogo.

Longleng District Planning & Development Board senden menogo



Longleng DPDB senden May 16, 2026 nü aliba mapang tangokba noksa angur.

Dimapur, Monupii/May 17 (TYO): Longleng District Planning & Development Board (DPDB) senden May 16, 2026 nü MLA & Chairman, DPDB Longleng, A. Pongshi Phom lenisüba kübok mena liasü.

Deputy Commissioner Longleng, W. Manpai Phom, NCS ajanga pela agizükba o jembu aser ketdangsurtem dang iba senden nung jembitsü atema department dak sendakba onük tem bener arutsü ajungmesoa liasü.

Iba senden nung OC Police Station Tamlu nungi SDPO Tamlu akumtsü indang jembia department dangi yok. Yimha Junction nungi Brua Namsang tashi Apoji ajanga Foothill Road Shetap Village tashi lenmang yanglutsü asoshi proposal ka Tamlu Public Forum ajanga benoka aliba onük nung EAC Tamlu, Mopling N. Phom

ajanga rateta ashi aser sorkari dangi abentsü mulunga agizük.

MLA & Chairman DPDB, A. Pongshi Phom-i taküm nungi tenzüka private aser government school tem nungi HSLC aser HSSLC topper aser subject topper atema DPDB Meritorious Award agütsüsü indang onük benoka liasü.

Chairman-i züngsemtem dang World Environment Day 2026 mapang libajen wazüka ayutsü atema süngdong-lidong atemtsü ayongzüka liasü aser house-ia Longleng Town nung June ita mezüng hopta nungi plantation drive tenzüksü pangjema liasü.

Deputy Commissioner-i HoDs tem dang pei posting tesem nung alitsü aser staff tem mapa shidak inyakkdaksütsü nenshia ashi.

Mapa meinyakba departments tem süoki ia

reprangtsü aser temaba ketdangsur dangi osang yoktsü, ta pai ashi.

Senden nung SDO Power Longleng, Moiching Shembu-i Smart Metering Installation indang PowerPoint presentation agütsü aser District Soil & Conservation Officer Longleng, P. Angming Koyak-ia department inyakyim indang PowerPoint presentation agüja liasü.

District Economics & Statistics Officer Longleng, Nyushotho Nyuthe-i lokti dang district nung arishi küm 0-5 tsüngta tanurtem atema Aadhaar digital registration tenzüka indnag metetdakja liasü.

Taruba DPDB senden nung Medical Department dang par department inyaksangshiba osang agütsütsü nunglokja senden tembang.

Mokokchung aser Longleng nung National Dengue Day amung

Dimapur, Monupii/May 17 (TYO): National Dengue Day 2026 nüngtem nung National Vector Borne Disease Control Programme ajanga May 16, 2026 nü "Community Participation for Dengue Control: Check, Clean and Cover" omen nung ajemdaker sentong ka Mokokchung district kübok tesem balala nung ayongzüka liasü.

Iba mapang Mangkolemba, Tuli, Alongkima, Tsurangkong aser Changtongya block tem nung dengue tashidak indang awareness agüja liasü.

Kasa mapang CMO Office, Mokokchung nunga Dr. Martula Lemtur-i dengue awareness sentong ka ayongzüka liasü.

Iba anogo district kübok health units tem nung mürekmejuba mapa inyaka merila poktetba samatsütsü aser dengue tashidak nungi jembua

aser aziüka alitsü mechi nuro pots, containers, cans tamajung, tyres, gutters nungi menüngdakba tzü indoka liasü.

MTS aser ASHAs temi kibok sema merila poktetba tesem samadaksütsü awareness agüja jaja.

MTS, MI, SI, CHOs, Medical Officers, Staff Nurses, aser ASHAs temi dengue tashidak nungi jembua alitsü aser aziüksü atema awareness talks ayongzüka liasü.

Yimtsüng ajanga nung MTS aser ASHAs temi dengue awareness indang poster campaign ayongzüka aser NVBDCP team aser health workers temi dengue indang Interpersonal Communication (IPC) ayongzüka liasü.

National Vector Borne Disease Control Programme, Directorate of Health & Family Welfare tawabangba kübok

NVBDCP Longleng teyari nung District Health Society Longleng ajanga Honibarnü "Community Participation in Dengue Control: Check, Clean and Cover" omen kübok National Dengue Day munga liasü.

Iba mapang District Hospital (DH) Longleng, Health & Wellness Centres aser Sub-Centres densema district nung Health Units ajanga nung mürekmejuba mapa inyaka liasü, kong ketdangsur aser nürburtemi shilem tajung agia merila poktetba tesemtem azüngteta aser müreka jaja.

Health workers aser NVBDCP staff temi school aser tesem balala nung dengue indang awareness sentongtem ayongzüka liasü, kong kaketshir aser nürburtem nem dengue agi shirangba yimya, iba tashidak aziüksüba aser jembua alitsüba yimyatem angazükdaksü.



Narcotic Drugs and Psychotropic (NDPS) apuba May 16, 2026 nü Kohima dumping site, Meriema nung rongdokdang tangokba noksa ka nung Dy. Inspector General of Police (CID) & Chairman, Drug Disposal Committee for State Level Police Stations Nagaland, Kohima, T. Chumrenthung, IPS den Drug Disposal Committee züngsemtem angur.

Dimapur nung tzümetsüng agi kongshiba tesem asadangtsü senden amentsü

Dimapur, Monupii/May 17 (TYO): Dimapur aser East Dimapur telungzüka nung mapang shia tzümetsüng agi kongshiba tesemtem asadangtsü atema Chief Secretary, Nagaland lenisüba kübok senden ka May 18, 2026 nü Circuit House, Dimapur nung amentsü.

Deputy Commissioner & Chairman, DDMA Dimapur, Dr. Tinojongshi Chang, NCS ajanga sangdong ka agütsüba nung, Nagaland State Disaster Management Authority (NSDMA), Home Department, Nagaland nungi totuyuba agütsüba ama iba senden ya

ayonger, ta ashi. Sendaktepa aliba departments aser lokti tentet ajunga May 18 anepdang 9:30 ako nung Circuit House, Dimapur tonga arutsü metetdaksür, ta sangdong ajanga ashi.

Iba senden nung Commissioner of Police, Dimapur, administrative officers, CEO DMC, Water Resource Department, Urban Development Department, EE PHED, Nagaland Pollution Control Board, Chairman DMC, Chairman East Dimapur Town Council, aser DPRO department tem adentsü.

Kohima-Mao tsüngta NH-2 nung gari tulu senzüba nokdang

Dimapur, Monupii/May 17 (TYO): Deputy Commissioner, Kohima, B. Henok Buchem ajanga sangdong ka nung Kohima-Mao section National Highway-2 nung apu tashi maitba mechi gari tetsüng 10 aser tema kecha mesenzüi alitsü metetdaksüogo.

May 12, 2026 nü sangdong agütsüba nung, highway nung apu kar tashi maitba indang National Highways and Infrastructure Development Corporation Limited Regional Office, Kohima, aser NHIDCL PMU-Jakhama ajanga osang aruba sülen iba telemtetba agi, ta ashi.

Structural assessments

agiba nung Chainages Ch. 194+700, Ch. 198+680, Ch. 200+020, aser Ch. 210+100 nung aliba apu tem tashi mait aser lendong lir ta asadantet.

Lendong aliba agi aser ano tali tamajungba kuma raksaba nungi nokdangtsü mechi May 18, 2026 nü nungi tenzüka gari tulutem mesenzütsü aser tarutsü nung sangdong ka magütsü tashi shibanga alitsü, ta ashi.

Iba totuyuba nung aibelener nem ozüng kübok tapet temerenshi agütsütsü.

Deputy Commissioner-isa NHIDCL ketdangsur dang tekeraba nung item apu yanglushitsü metetdaksüogo.

Peren nung Mini Legal Services Camp ayongzüka

Dimapur, Monupii/May 17 (TYO): Nagaland State Legal Services Authority ajanga Peren District Legal Services Authority aser District Administration Peren den lungjemer May 16, 2026 nü Mini Legal Services Camp ka Peren Town Hall nung ayongzüka liasü.

Nürburtem nem legal awareness tali tajungba nung angatetdaksütsü aser "Access to Justice for All" mangdang temaba jenjang nung ajungkettsü nükjidong nung iba sentong ya ayongzüka.

Iba camp nung judicial officers, district administration, Heads of Departments, legal practitioners aser kaket rejutem nungi tesayur aser kaketshirtem adenshia shilem agia liasü.

Iba senden nung Deputy Commissioner, Peren, Hiazu Meru-i administration aser legal institution tsüngta teka amteper nürburtem nem teyari lenmangtem sayua awareness agütsütsü ayongzüka liasü.

Iba sentong nung PDLSA

aser Legal Literacy Club, Peren Government College ajanga "Consumer Justice Quest" nüngja agütsür presentation ka agüja nürburtem asoshi consumer rights aser legal safeguards indang angatetdakja liasü.

N. Longshithung Ezung, NJS, District & Session Judge, Peren-cum-Chairman, PDLSA ajanga pela agizükba jembidang, grassroots level nung ochi obendang tashi itshitsü asoshi nürburtemi shilem agitsü aser legal literacy tongtipang lir ta ashi.

Neiko Akami, NJS, Member Secretary, NSLSA ajanga sentong ayongzüka nükjidong lemsatet aser Mini Legal Services stalls tem lapokja liasü.

Senden nung Adv. Lhingneinem Hangshing, Chief LADC, PDLSA menden liasü aser S Haigangbeu Hengame, Youth Secretary, ZBCC ajanga sarasadem.

Sentong tembanga Khrievonou Seletsu, NJS, Chief Judicial Magistrate-cum-Secretary, PDLSA ajanga melepzüng o jembia sentong tembanga liasü.



May 17, 2026 nü 'Symi' tanker nung liquefied petroleum gas (LPG) touzük ton 20,000 bener Gujarat kübok Kachchh district tonga aruba mapang tangokba noksa nung angur.

Ukraine-i drone amshia Russia amakdang India nunger ka asü

New Delhi, Monupii/May 17 (Agencies): Amongnü Ukraine-i drones aika amshia Moscow region amakdang India nunger mapa inyaker ka asü aser asem yiruogo, ta Indian Embassy-i metetdaksü. Indian Embassy-i X ajanga, "Tanep drone amshia Moscow region amakba mapang India nunger ka asü aser asem yiruogo. Embassy ketdangsertemi iba tesem semdang aser hospital nung yirua alirtemjia ajuruogo. Nisung asüba atema Embassy-i mangyim jashi lemsateper. Mapa inyakerkem nem nüngdakba teyari balala agütsütsü atema onoki

company management aser local ketdangsertem den jembishinüa inyakdar," ta metetdaksü. Ukraine Tir, Volodymyr Zelenskyy-i, Ukraine-i Russia amakba ya tim dang, ta metetdakja liasü. Anogo ishika tejaklen Russia nungertemi drone aser missiles amshia Ukraine yimtiba, Kyiv amakdang nisung 24 süogo. "Russia nem telangzüba agütsüba tim dang. Tangbo Ukraine nunger long-range drones ajanga Moscow region tongogo, aser onoki Russia nungertem dang ya ashir-nenoki iba rara ya anentsüla," ta Zelensky-i metetdaksü.

Russia ketdangsertemi ashiba agi, Honibar aonung nungi tenzüka aonung piyong Ukraine nungeri drone 600 shi amshia linük amakdang nisung pezü süogo. Ukraine Tir Volodymyr Zelensky-ibo ibaji metenja jembir, ta metetdaksü. Russia defence ministry-i, parnok indang air defence systems ajanga Ukraine nunger drones 556 nokdangteta liasü aser sangwali drones 30 nokdangtet, ta metetdaksü. Ukraine nungertemi drones aika amshia Russia nung region 14 den külemi Russia-i atsünga agiba Crimea, Black & Azov seas amak, ta defence ministry-isa metetdaksü.

Bengal sorkari anogo 45 tsüngda BSF sepaitem nem ali agütsütsü

New Delhi, May 17 (Agencies): Amongnü West Bengal nung Minister Ashok Kirtania-i, India-Bangladesh arrtsülen atsü atsütsü atema state sorkari anogo 45 tsüngda Border Security Force (BSF) sepaitem nem ali agütsütsü, ta metetdaksü. Kirtania-i, iba maparen ya district aika nung, talisa North Bengal nung aliba district tem nung kanga junga inyaka odar, aser linük security akangshitsü atema sorkari tekaraba nung sepaitem nem ali bendanga agütsütsü, ta metetdaksü. Sorkar tasenba mezüngbuba cabinet senden

Chief Minister Suwendu Adhikari-i arrtsülen atsü atsütsü atema telemtetba agiba ya sangdonga liasü. Sorkari ketdangsertem dang BSF nem ali bendanga agütsütsü atema maparenji tekeraba nung inyakang, ta tuyua liasü. Arrtsülen atsü atsüba ajanga ozüng alema bendangertem linük telungi aitba nokdangtsü. Tamalen Election Commission aser Union Home Ministry-ia Bangladesh-India arrtsülen tekeraba nung atsü atsütsüjü kanga tongtimbang, ta metetdakja liasü.

Tanü Kerala nung VDSatheesan-i CMtenangzükba agitsü



New Delhi, Monupii/May 17 (Agencies): Hombarnü Kerala yimtiba, Thiruvananthapuram nung VD Satheesan-i Chief Minister tenangzükba agitsü. Iba sentong nungji Congress Tir Mallikarjun Kharge aser Lok Sabha nung opposition lenir, Rahul Gandhi na densema party nung lenirtem aika alitsü. Iba sentong nung Wayanad MP aser Congress general secretary Priyanka Gandhi Vadra, Congress Parliamentary Party tongti, Sonia Gandhi, Congress sorkar aliba state tem- Karnataka, Telangana aser Himachal Pradesh nungi

Chief Minister tem-a adentsü. Tenangzükba agiba sentong nung adentsü atema Congress party-i TVK tongti lenir aser Tamil Nadu Chief Minister Vijay-a jaokogo, ajisüaka tang tashi nungbo pai telangzüba kecha magütsü. Anepdang 10:00 ako nungi tenzüka Thiruvananthapuram nung aliba Central Stadium nung Satheesan den pai aniba Cabinet-i tenangzükba agitsü. Congress-i Chief Minister menden atema Satheesan tenüng sangdongba sülen tesüba anogo ishika tsüngda pai yimtenren lenirtem aika ajuruua arudar. Amongnü pai Syro-Malankara Catholic Arogo nung tekolak, Cardinal Baselios Cleemis den putirtem aika ajuruogo. Parnok minute 30 shi senden amenba sülen parnoki külemi osangbenertem den jembia liasü. Honibarnüa Satheesan-i Kerala nung Congress lenir tain K C Venugopal-a ajuruua liasü.

Tebilemba benoktsü atema opposition lenir dak temeden lir: Athawale



New Delhi, May 17 (Agencies): NEET-UG 2026 paper leak asüba ken o dak sendakba nung Congress lenir aser Lok Sabha nung opposition lenir, Rahul Gandhi-i Union education minister Dharmendra Pradhan menden nungi anentsütsüla, ta takhangba agütsü. Iba dak sendakba nung NDA sorkar nung densema alisang Union Minister Ramdas Athawale-ibo, Lok Sabha nung Opposition lenir ka ama pa tebilemba onüktem benoktsü atema pa dak temeden lir; joko item ama tatalokba malitsü atema sorkari ajaklen nungi tebilemba angadanga shisa agitsüla, ta shiogo. NEET paper leak asüba ken o bushisüngdangba mapang nung Central Bureau of Investigation (CBI)-i nisung aika puogo. Amongnü osangbenertem den jembidang Union Minister Athawale-i, "Centre sorkari

paper leak asüba network ya raksatsütsü atema inyaksü aser tarutsü nungbo item ama tatalokba malitsü atema inyaksü. Dharmendra Pradhan-ia iba tatalokba ya tagizüktettsüla masü aser iba ya ajanga kaketshirtem mejungi kongshir ta shiogo. Kaketshir asembo soseta süogo. Centre aser state sorkartemi iba ya süoki ia agir. Paper leak asüba ya tarutsü nungbo mataloktsüla," ta metetdaksü. Paise, "Rahul Gandhi-i maneni tai tongloksür aser Education Minister menden nungi anenjang ta akhanger, saka iba ya politics shilem ka lir. Opposition lenir ka ama tebilemba onük benoktsü atema pa dak temeden lir. Democracy linük ka nung asenoki tesem ajaklen nungi tebilemba angadanger. Tarutsü nungbo item ama tatalokba malitsü atema sorkari inyaksü," ta metetdaksü. Ano külen Union minister

Arjun Ram Meghwal-i sorkar pusema, aibelener ajak nem temerenshi tulu agütsütsü, ta metetdaksü. Meghwal-i, "Bushisüngdang tesüdak mapang nung parnokia iba nungji rangloksüla, saka parnok opposition menden nung lir, anungji parnoki parnok jeminütsü jembitsü. Bushisüngdangba maparen kanga kera inyakdar. Aibelenertem lira parnok dang tai matoktsü," ta metetdaksü. NEET-UG 2026 question paper leak asüba tatalokba dak sendakba nung Rahul Gandhi-i Ato kilonser Narendra Modi aser Centre sorkar maneni aija arudar. Rahul Gandhi-i X ajanga, exam paper leak asüba tatalokba ya maneni ataloker, süra kechiba Dharmendra Pradhan menden nungi manentsür?, ta asüngdang. Rahul Gandhi-i, "2004 küm NEET paper leak asü. Tatidanga tamagila kümtsü. Minister-i menden nungi manen. CBI-i bushisüngdang tenzük. Committee ka tentet. NEET 2026 nunga paper leak asü. Tatidanga tamagila kümtsüogo. Tang tashi minister menden nungi manen. CBI-i ano bushisüngdang. Ano committee ka tentettsü," ta metetdaksü.

पावरग्रिड POWERGRID

SANGDONGER

- Electricity Act, 2003 kübok Section 79 (1) (d) aser Section 62 kübok Central Sector kübok **Reliable Communication Scheme** kübok aser Central Electricity Regulatory Commission (Conduct of Business) Regulations, 2023 kübok Regulation 15 (1) (a) aser Regulation 23, iba denji Central Electricity Regulatory Commission (Terms and Condition of Tariff Regulations) 2024 kübok asset atema determination of tariff asoshi petition meshir.
- Tekalen shia aliba Transmission system nungi beneficiaries item ya asütsü:** (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board
- Tariff osang tejangja:**

Name of the Asset	Asset-1	Asset-2	Asset-3	Asset-4	Asset-5	Asset-6	Asset-7	Asset-8
Schedule DOCO (FR)	31.07.2024	31.07.2024	31.07.2024	31.07.2024	31.07.2024	31.07.2024	31.07.2024	31.07.2024
DOCO (Actual)	09.04.2024	31.07.2024	29.09.2024	04.10.2024	13.02.2025	11.06.2025	05.01.2026	12.02.2026
Estimated Completion Cost (Rs in Lakhs)	414.13	238.48	2136.3	412.56	1231.59	345.9	386.96	790.55
Tariff for year 2024-29 (Rs. in Lakhs)								
2024-25	62.68	26.2	172.24	33.15	27.57	0	0	0
2025-26	70.41	40.53	350.87	72.42	215.34	48.13	15.29	15.04
2026-27	72.34	41.62	366.87	76.26	220.37	61.49	70.33	131.3
2027-28	74.16	42.67	381.99	75.5	225.02	62.76	71.19	146.3
2028-29	72.99	42.04	377.85	73.36	221.37	61.83	69.36	142.46

- Determination of tariff atema application copy ka applicant indang website www.powergrid.in nung angutsü.
- Application nung aliba determination of tariff proposal nung tebilemba mesüra tashishiba kar danga lira iba sangdong agütsüba sülen anogo 30 tsüngda beneficiary densema nisung mashie kati Secretary, Central Electricity Regulatory Commission, 6th, 7th & 8th Floors, Tower B, World Trade Centre, Nauroji Nagar, New Delhi-110029 (mesüra Commission indang office aliba address nung) applicant nem-a copy ka densema corporate office indang address nung agütsütsü akok.

Place: Gurugram Sd/-
Date: 14.05.2026 General Manager (Commercial)

POWER GRID CORPORATION OF INDIA LTD
(A Government of India Enterprise)
Regd. Office: B-9, Qutab Institutional Area, Katwaria Sarai, New Delhi 110 016
Corporate Office: Saudamini, Plot No.2, Sector-29, Gurugram, Haryana - 122 001
Website: www.powergrid.in, CIN: L40101DL1989G01038121

A Maharatna PSU



TIR YIMYIM YIMOBILEM (EDITRIAL)

DIMAPUR MONDAY, MAY (MONUPII) 18, 2026

Balala ser külemi inyakba

Asenok Naga nunger aser talisa Aortem ya chiyongtsü züsenteta yoka aruba kin masü, ibayongji tanü tashi asenoki asen nungdak kechisarina alitsü bilemer dang ashi, ayoktsübo kecha mebilemer. Aji oda, tangar kinbo benjongbentsü arudang kechi ayoktsü ta bilema jelia renemer atar saka asenokbo kechi alitsü (?) ta bilemba agi shisabolua atar. Akhi tsürabur mapang nungi tanü tashi nung asenok o pi na tepilaji aji lir. Atangji, iba jagi tangarbo mapa inyaker takar kuma alir saka asenokbo mapa meinyaker ta masü saka asenoki mezünyongji asenok peritsü asoshi dang bilema inyakba agi asen nungdaka meperitet timatemer. Aji oda, tangarbo aluyim tenzükdangyongi pei peri dang masü saka tangar dang ayoktsü asoshi bilema inyaker, iba jagi kasa aluyimer aser kasa anogo shia mapa inyakertemsa süaka, tangar takar kuma alir saka asenokbo tesensakba kuma alir. Asenoki aiben lokti senden sentong nung " asenoka tangar menepa alitsüla," ta jembiba aser angashiba nungdak tesemji ibai lir. Atangji, asenoki rongsen akaba aser renlokba nung tangar meneptsüba dang masü saka ajateta-a otettsü, ajisüaka tamasa asenok kolok nung akhi tangatetba aliba ya tanü putu den apet melentsüla. Aji oda, mapa melentsüba masü saka tangatetba melentsü aser inyakyim melentsü kisung masü saka tangatetba tama melentsübajiang kanga tongtibang lir. Iba tangatetba nung asenoki kodang asen asoshi dang masü saka ayoktsü asoshi bilema aluyim tenzükdir mesüra tagitsü oset kar yanglu tenzükdir, idangjiang asenok rongsen jenjang tajungba akümtsü. Atangji, alu tuluka asen kijai ayimtsüla ta ashir masü mesüra asen kijai tagitarutsü ka alima nung nisung ajak peria yangludi ta masü, saka asenok ajaki pei pei akok alu tilala ayimtsüa akok saka aluyimer ajak dang nungi nisung kati aonsutsüji alizüktsü aser iba nisung jagi tayokdaki bener orr tayoker (retailer) shia nem agütsütsü. Kasaji, alima nung nisungtem nungdak oset ka asenok nisung shiai pei pei akok yanglutsü aser item ajakji nisung kati bendener tayokdaki bener aotsü aser yangji shishir (retailers) nem agütsütsü ta kodang asenoki tangar inyakba jilu ajizüka inyakdir, ayongayonga asenoka tangar amaji asen inyakba agi takar kuma alitsü. Aji oda, tatishitsü agi, asenok ajaki bonglashi lu ayimtsü aser item ajakji alu nungi dang nisung kati alizüktsü aser nisungba jagi tayokdaki bener oa tayokertem dang ayoktsü ta inyakra aluyimertem alu adena moi sen angutsü. Kasaji, asenok ajaki nok yanglutsü akok mesüra sü ataktsü akok, saka peii yangluba nok aser peii atakba süji peisasa yoka mejajai nisung kati dang item ajakji bendener tayokdaki bener orr yokra, oset yanglurtemjia pei ki adena moi aser nübodoka yoka mejajaji sen angutsü. Aji oda, tanü yabo alima nung nütsung aika asünungji tachitajemer aser tagitarur aika nungdak peritsütsüsa akümer asünungji, iba tebilemstü aser nungdak agi mapa inyakertem asoshibo temoatsü kümer, akhi mapang asen asoshi dang masüyonga tangar nungdakba pur ishishi atema bilema inyakbato, tanübo nisung aika asoshi bilema aika züsentettsü aser aika yanglutsü asoshi bilema inyaker. Atangji, tanü tashi asenok dak akhi tangatetba ka memelenshitetbaji, asenok ket nung akaba ishikaji sen aikayong ayoktsü aser oset shia tajangzük tuluka keta angutsü bilemer, iba jagi asenoki asenok akabatem meyokteter saka tangarbo oset shia tajangzük tilala keta ayoktsü saka aji aika ayoktsü, anungji tajangzük tululu oset ter-metsüka nungi anguba dang nungibo tajangzük tilala oset meyirijang aser lakh ta ayokba nungi anguba tajangzük tuluba asütsü. Tatishitsü agi, asenoki amshiba mobile phone nung yanglutetba SIM card ya asenoki yanglutet nungbo ka nung sen meyirijang aika meshitsü, anungji aikati malitettsü, anungji tajangzüka iba yari dang asütsü, saka tangar teyanglutetertemi aseok dang sen mechimenu ka yong ayoker aser aji amshia mobile phone nung jembiba asoshia minute nung sen paisa ishika agir, ajisüaka itemji nisung million aikati amshir, anungji SIM shiaji anogo nung sen kaka danga angununga, anogo nung sen billion dak tali aar asütsü. Tanü putu nung asenok daka iba tangatetbaji asen kolok nung alitsüla. Iba jagi dang asenoki tangar-a meneptsü aser tajateta ajatettettsü.

OLEMSABANG

KECHI KOMALA KIBONG DANG KHRISTAN KIBONG TA AJATSÜ ?

~ L. Kika Pongener

(Yashi adok nungi...)

Khristan kibong aika nung 'Common Room' nung Frame ka nung yamai zülur idaka ayur, " Christ is the head of this house".... "The unseen Quest at every meal".... "The silent listener to every conversation"....Anungji Frame idaka ayubaji tobur ajungtsü aser tazütsü atema dang masü.....Saka kibong nungji Yisu Khrista-ji shitakba nung tokolak sudaktsütsüla. Kibong nung chiyungba mapang shia tenuki manguba 'Tesemdanger' ka teti lir ta metettsüla. Kibong nung sensaksem aser jembishinuba ajak ola madoki anga-a alir ka lir ta metettsüla. Asenoki asen kibong nung Yisu Khrista tokolak sudaktsür asü (?) Mesura rongsen aser konang, tetushi aser tashi (Power) kibur sudaktsür....??? Asenoki asen kibong nung alima rongsen, konang-nungsang aser alima tashi....itemji kibur sudaktsüra, asen kibong nung kodanga chichiba tepela aser tesunep malitsü. Ano asen kibong anogo shia chiyung-ajemba langpang sunga chiyungtsü tapu tapu yur chiyunga-ajembaji....Kolen nungi kechi koda bener aruba agi chiyunger (?) Tim lenmang nungi bener aruba rongsen agi asü (?) Aji oda, ochishia meranga züsener bener aruba nungi chiyungba nung anisungzük tepela lir; aser iba nungji tarendaktsü tetsübotsü kecha mali; nang-nanga jangradema chiyungtsü. Asen kibong telung nung anepdang aonung shia sensak-aseмба aser jembishinuba; apuani tsüngda mim-sensaksem; aser chirnur o tsürabur tsüngda sensak-aseмба....item ajakji tenungsang o, tajungshi o, aser tepelaba o jembir asü...??? Mesura tangar kar majung indang nungsen-pangsen o jembir....??? Mesura yimden, arogo aser loktiliba majungba kar indang nungsen-pangsen o jembir (?) Aji oda, asen kibong telung nung jembishinuba aser sensak-aseмба ajakji Tsüngremi ola madoki tanemi angadagi ta metettsüla.

Kibong ya yin atsüngdak yimsem amai lir; yin-atsünger kati iba yinsem nung ataloker; pai aginuba osettsüset tapu ajak atsünger. Alima nung nungtuko nisungtem, nungtuko lennirtem, nubur aikati Tsüngrem amai külemba (Celebritis); Scientist, Astrologers, Politicians, Actors, Sport-Persons, etc....Item ama nungtuko nisungtem ajakji kibong ka nungi sotetba lir. Alima nunger rongnungi mezüng ita nung tetsüng ajemoksang Neil Armstrong-jia kibng ka nungi sotetba. Mapang ka nung alima ajak akoksang Alexander the Great-jia kibong ka nungi sotetba. Alima nung sayutsüngir tulutiba Billy Graham-to-a kibong ka nungi sotetba. Mapang kabo alima nung 'Most Wanted Terrorist' Osama Bin Laden-toa kibong ka nungi sotetba liasü. Surabangla, tanü asenok kibongtem nungia kechi komala nisungtem atokdaktsütsü....??? Alima nung nubur ajak asükdema nukendaktsütsüsa ashi-auer, rakzükraaktermer aser kira-longrar atokdaktsütsü asü (?) Mesura alima yanglur, alima lennir, sayutsüngir; nubur ajaki aginuba nungtuko nisung atokdaktsütsü....??? Ibaji asenok ajak asoshi tasüngdangtsü aser shisadangtsü tulu-ka lir. Kibong mejungra alima nung aliba sorkar, yimden, arogo aser loktiliba ajunga ya majungtsü.

Tanü putu nung kibong aika nung kinungbu külen yi-lar kümer, lidibudia kibong kechi jenjang nung lir memetet....Kinungtsü kechi jenjang nung lir memetet....Chirnur kechi jenjang nung lir memetet taküm lisa-a aliba angur. Ano kinungtsür aikai kinungbu koda alir memetet....Chirnur kong lir memetet....Sen dang penpua anepdang saakli nungi nikongdang anu ayiba tashi ki toktsür jajaba kinungtsür aika lir. Tanü putu nung kibong aika kinungbu Alcohol addicted, kinungtsü T.V Serial addicted, jabaso Drug addicted, aser jala Smart Phone addicted....Iba amala kibong aika lir. Aji oda, kibong ka nung Yisu Khrista tokolak aser Kibur mesudaktsüra; iba kibongji kecha tetezü makaba kibong ka asütsü. Aser iba ama kibong ka dangji 'Khristan Kibong' ta majatsü. Anungji kibong nung chiyunga-ajemba, jembishinuba, sensaksemba, libaliruba, inyaksangshiba ajak agi Tsüngrem sentsüwangshidaktsütsüla. Iba dangji dang chichiba Khristan kibong ka ta ajatsü. Tsüngrem o-i ashir, "Anungji nenoki chiyungaka, jemaka, kechisarena inyak-aka, ajakji Tsüngrem sentsüwangshi asoshi inyakang" (1 Kor-10:31). Aji oda, asenoki kibong ya kanga akümtsümbua, tushia, meraküta aser asüngteta ayutsüla....Kechiyong kibong ya asen mimchir mulungba agi yangluba masü; saka Tsüngremi pa sentong aser nukjidong tuluka yur yanglu.... Anungji asen kibong ajanga iba Tsüngrem'er sentong aser nukjidongji atalokdaktsütsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

'March for Jesus' sentong nung meyrjang aikati shilem agi



May 16, 2026 nü Belfast nung "March for Jesus" sentong nung shilem agirtem kar noksa nung angur.

May 17, 2026: May 16, 2026 nü northern Ireland yimtiba, Belfast nung nisung meyrjang aikati "March for Jesus" sentong nung shilem agia jajaogo.

Anepdang 10:00 ako nungi tenzüka lokti tulu Ormeau Park nung adenshiba sülen nikongdang 02:00 ako nungi parnoki yimdong süa jaja tenzüka aser yimti tiyong adena aoba sülen tatemsa Belfast City Hall nung sentong ka agia tembang.

Belfast City Hall nungji parnoki tekülem sentong ka agi, sarasadem aser taküm kulitem lemsatepa liasü.

Ballymena nungi Deborah McCracken-i, 2025 küm nunga

lai iba sentong nung shilem agia liasü aser taküm-a iba sentong nung adentsü la ajungmesoa liasü, ta ashi.

Laisa, "Linük tesem balala nungi Arogotem aser Khristantem külemi longjemba ya jangratemtsüka lir," ta ashi.

"Yisu atema longjembenjungteptsü aser nüburtedang Paji alima atema teimla, ta sangdongtsü atema onok yangi adenshia lir," ta laisa shisem.

Iba sentong ya yimtenren den sendaktepa mali, ajisüaka iba sentong ya Khristan tamang atema benjungtepba sentong ka lir.

March for Jesus ya Christian Voice Ireland-i

ayongzük. Iba telok nung linük nung aliba Arogotem aser lenirtem aika densema lir.

Iba sentong nung shilem agirtem aikati 'Asen linük ya Yisu atema' ta asüba ozülü amer liasü.

Iba sentong nung shilem agitsü atema United States nungi Luke Dean-a arua liasü.

Luke Dean-i, "Yisu meimertem den longjemtsü atema ni yagi aru. Alima tammang tia nung aliba mapang ka nung Yisu dakbo tesangwa lir, teimla lir aser tekümtet lir," ta ashi.

Yaküm Dublin nung mezüng ayongzükba March for Jesus sentong nung nisung 8,000 dak temai shilem agia liasü.

America nung tsürabur 29%-i dang chirnurtem den külemi sarasadem

May 17, 2026: America nung tsüraburtem shilem ishikati dang pei chirnurtem den külemi sarasadem, ta American Bible Society-i metetdaksü.

American Bible Society-i May 14 nü "State of the Bible: USA 2026" report tanabuba shilem ya sangdonga liasü.

"Parenting with the Bible" ta ajaba report nungji America nung tsüraburtem aser Arogotem den parnok tesendaktep indang osang metetdakja lir.

Taküm January 8 nungi tenzüka January 27 anogo tashi iba survey agiba nung US nung tain 2,649-i shilem agia liasü.

Iba survey nung shilem agir tsüraburtem shilem 29-i dang parnoki anogo shia pei chirnurtem den külemi sarasadem, ta ashi. Tsüraburtem shilem 21-i parnoki khenkhen dang chirnurtem den külemi sarasadem, ta ashi aser shilem 35-ibo parnoki kodanga chirnurtem den külemi

sarasadem magir ta ashi.

American Bible Society nung chief innovation officer aser "State of the Bible" series editor in chief, John Farquhar Plake-i sangdong ka ajanga, "America nung tsüraburtem teimbakati Laishiba azünger, ajisüaka yamaji mebenshir. Kasa tsüraburtem jagi mapa, kibong aser tanur anepaluba tsütsü tayongzükba kanga ajangshir," ta ashi.

Plake-i, "Arogotem nungita yariba ajanga tsüraburtem pei chirnurtem den külemi sarasademtsü aser Laishiba züngtettsü. Tsüraburtemi khuret tulu abener, anungji Arogo nung ajaki parnok khuretji yaritepa abentsüla," ta ashi.

Ano tsürabur shilem 14-i dang parnoki chirnurtem den külemi Lai azünger ta ashir. Iba nungjagi tsürabur shilem 5-i dang parnoki anogo shia chirnurtem den Lai külemi azünger ta ashi.

Iba survey nung shilem agir tsüraburtem shilem 25-i parnoki chirnurtem den Laishiba khenkhen dang

azünger ta ashi.

Tenla kidangi aoer tsüraburtem shilem teimbakati parnok chirnurtemi Tenla kidangi aotsü jangrar ta ashi.

Kasa survey nungji tsüraburtem dang, ner Arogoi nenok nungita yarir asü? ta asüngdanga liasü. Tenla kidangi aoer tsürabur shilem 92-i Arogoi parnok nungita yair ta ashi.

Arogoi onok nungita yarir, ta telangzüba agütsürtemji teimbaka Evangelical Protestant tem (shilem 91) liasü.

Generation X tsüraburtem shilem 84, black Protestant churches nung tsüraburtem shilem 18, tetsütem shilem 78 aser arrshi küm 2-17 tsüngdapur tsüraburtem shilem 72-ia Arogoi parnok nungita yarir, ta telangzüba agüja liasü.

Millennials (1982 nungi 1996 tsüngda asortem) rongnung tsürabur shilem 64-i parnok Khristan ta ashi aser kibong makümer shilem 49-i parnok Khristan ta ashi.

ANOGO ABEN TSÜNGREM DEN

Pai agizükogo!

"Saka pa koda tesangwa nung lir, aji oda asenoki tesangwa nung jajara, asenok medemer o medemer na telongjem kar, aser Pa chir Yisu zü agi temenen ajak merükdaktsür" 1 Yohan 1:7.

Tsüngrem den telungjemji tenük agi manguba Tsüngrem bushibaren tebilemba ka dang masü, saka taküm aliba tesendaktep ka lir. Tsüngrem den maneni hai-haura ka-a taküm alibaji tesangwa nung jajaba. Ni tesangwa nung lira satani ni aitsütsü makok, saka tesangwa nung jajaba tetezü jakla (moral) junga aliba masü (1 Yohan 1:8). Asenok temenen memenaba nisung masü, saka nangzükba jagi asenok pa tsüngdangi hai-haura kaa anir arur (1 Yohan 1:9).

Tsüngrem tsüngdang temenen nangzükba jagi asenok Pa chirtem akümtsü lenmang lapoktsür. Asenok teti taküm jengangji songdaka mayur, anogo shia takokji dang ayur. Tsüngremi agizüktsü bilema tajung ama sayutsü memerangtsüla. Pai asenok Par chirtem ama agizükadok nung asenok mapang ajak nung ochi shia alitsü nüji lir.

Asenok nem Pai taidok agütsüogo ta meteta tenüngsang aguja asenoki Pa dangi odi. Tsüngrem asen Tebu, aser tsüraburi ama Pai Par chirtemi merenshiba manganer. Asenoki pa dang tashi mangai nungdak meshiba nung Pai mepelar.

Asenok koma lir yamaji dang pa dangi arutsü ajar, kechiaser Khristai asen tashi mait ajak aben. Asenok tamang agi pa anasai odi aser Pa den telungjem akatsü lenmang lapoktsüba asoshi Pa tenüng sangdi.

China nung CCP züngsem dang nungibo Khristantem teimba kümogo

May 17, 2026: China nung Khristan nütsüng million 130 kümogo aser underground Arogotem teimba-teimba dang akümer; tangbo China nung Chinese Communist Party (CCP) nung züngsemtem dang nungibo Khristan nütsüng teimba kümogo, ta osang ka ajanga metetdaksü.

China nung communist sorkari Khristantem reshikangshiaka iba linük nung Arogo maneni dang ainer, aser ibaji ajanga tangbo Communist Party-i Laishiba anema-a inyaktsüsa akümer, ta kasa osang ajanga metetdaksü.

China nung ketdangsertemi aliba Lai tekongtem Laishiba nungi agientsü aser socialist tangatetbatem züngoktsü tuyur.

Hardwired Global tentetsang, Tina Ramirez-i, "Tashiyim amshia Khristan yimsü toktsütsü rongshiba agi China ketdangsertem melung Laishiba-a tanaben zülushitsü meranger. Ibaji Khristantem ratamatadaksütsü aser Khristan yimsü dangi meyipba nokdangtsü atema lir," ta metetdaksü.

Tatishitsü agi, high school textbook ka nung Communist Party-i Yohan tapu 8 nung shia aliba Lai tekongtem melenshitsüogo.

Iba Lai tapu nung nüktapangta tsür ka apuba otsü shia lir, ajisüaka tangbo Lai tekongji melenshiba, "Pai (Yisu) lokti dangji, nenok rongnung temenen malir kati tama la dak lung agi onang ta ashir. Pai jembiba oji angashia parnok shinga tejakleni mao. Ajak senshiba sülen Yisui tetsürla dakji lung agi aon aser 'Ni-temenenpur ka' ta ashir."

ChinaAid Tir, Bob Fu-i, "Atangji tang yamaji atalokdar. Tensa tamajungba akümbaji onoki angur. Tanurtem nem Laishiba khenyongi mezüngdaktsür. Laishiba apps aser Laishiba dak sendakba apps ajak e-commerce app store nungi agienadoker," ta metetdaksü.

Voice of The Martyrs nungi Todd Nettleton-i, "Chinese Communist Party-i ajak azüoktsü meranger. Khrista osangtajung aser Khristan yimsü ajanga Communist Party jenjang mejungi akümtsü ta parnoki tsüba bilemer. Tang Chinese Communist Party-i Laishiba zülushitsü merangba ya parnoki Arogo azüoktsü nükjidong nung lir," ta metetdaksü.

China nung pastor kati, "Communist Party nungi yimsüsürtemi parnoki kodanga puoka meyetetba tsükchir ka shimogo. Atangji parnoki tamakok angutsü," ta ashi.

AO OSHI ANGAZÜKDAK:

TANÜ ANGAZÜKTSÜBA OJANG



Yasüing

(n) tesüiba aonung, taonung jakdang liasüba amang (last night)

* Yasüing aonung pungmang nung ni na ajuru.

Yasür

(Prep) iba sülen, kenlir (after sometime, another time)

* Yasür inyaksü mapa anüngzüka mayutsüla.

OLONG PAITEP # 7507

	1			2	3			
4			5					6
					7			
	8							
	9		10			11		
					12			13
14								
					15			

TIPLÉN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 7506 TELANGZÜBA

TIPLÉN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu, 15. Raksa,
- 16. Arameso.

LANGTSÜNGLEN :

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak,
- 10. Yongya, 11. Kongro, 13. Ora,
- 14. Ata.

NAI-A YA METETTER



South Africa nung Petshop Science and Montego Pet Nutrition ajanga Bloemfontein Show ayonga agidang alima otsü tasen ka yangluogo aser ibaji "largest donation of pet food in a 24-hour period" lir. May 1, 2026 nikongdang 5:00 ako nungi May 2 nikongdang 5:00 ako tashi Bloemfontein nung iba sentong agidang pet food seret 67,200 bendenteta liasü aser Guinness World Records ketdangsürtemi tenla aruba ajak jangjateper kuli agütsüogo.

Arunachal sorkari ST Bachao Andolan akhangba agizüker



Itanagar, May 17, 2026

(Agencies): State sorkari lisopur temetentem kümzüka ayutsü aser Inner Line Permit (ILP) system nung temelenshi asütsü nangzükogo ta Arunachal Pradesh ST Bachao Andolan-i metetdaksüogo.

Assam Home, ISBA, PH&EWS and DIA Minister nungi shidi ka ajanga Arunachal Pradesh ST Bachao Andolan dang parnoki akhangba onüktem agizüka mapa kuma inyaksü shia lir.

Iba shidi nung pua alirtem chioktsü, ILP system digitalize

asütsü aser tanga lateta aliba nung temelenshitem asütsü nangzükogo.

Sorkarisa kija aser telok kar nem Scheduled Tribe (ST) jenjang agütsüba mesüra tim mesüi amshiba ken o tem asadangtsü ta metetdaksüogo.

Arunachal Pradesh nung lisopur maitüsü, temetentem aser taginübatem kümzüka ayutsü atema "foolproof system" ka amenoktsü tebilemba lir ta ketdangsürtemi ashi.

State sorkarisa May 18, 2026 nü Mama Natung den senden ka

amentsü atema Arunachal Pradesh ST Bachao Andolan jaokogo. Iba senden nung ILP reforms aser lisopur kümzüka ayutsü asoshi onüktem benoka lemsateptsü imlar.

Iba shidi nung PS to the Minister for Home, ISBA, PH&EWS and DIA Minister Karken Dabi-i sign süa lir.

Arunachal Pradesh kübok ILP dak sendakba lungkak aitba sentong balala agiogo aser tesem kar nungbo ozüing alema inyaksangshioogo aser Itanagar nung police personnel kar yiru.

Guwahati nung AI-powered 'Phygital' branch lapok

Guwahati, May 17, 2026

(Agencies): May 16, 2026 nü Himanta Biswa Sarma-i Guwahati nung "phygital" banking branch ka lapoktsüogo.

Iba ya India nung mezüngbuba artificial intelligence-driven aser digitally integrated "phygital" lir.

Guwahati kübok GS Road nung Slice Small Finance Bank indang AI-enabled branch lapok.

Iba mapa ajanga Assam nung financial ecosystem akangshir aser state sorkari technology-driven investments nung temulung agütsüba den liromedemer ta Chief Minister Sarma-i ashi.

Iba nung customers-i separate loan applications menüngdaki UPI platform ajanga credit sütettsü ta paisa ashi.

"Iba mapa ajanga shishilembar

tilatem aser tetsür entrepreneurs-i mobile phones ajanga minute ishika nung working capital angutsü" ta Sarma-isa shisem.

Iba "phygital" branch ajanga AI-powered self-service kiosks, paperless cash deposit & withdrawal facilities aser simplified digital onboarding systems ajanga advanced digital services agütsür ta Slice Small Finance Bank-i metetdaksüogo.

Centre-i Tripura nung IRBn talila ka amenoktsü mulunger

Agartala, May 17, 2026

(Agencies): Union Ministry of Home Affairs (MHA)-i Tripura nung security framework akangshitsü atema India Reserve Battalion (IRBn) tasen ka amenoktsü mulunga agizükogo.

Iba osang ya Tripura Chief Secretary J K Sinha nem shidi ka ajanga metetdaksü aser shidi nung India President-i state nung India Reserve Battalion talila ka amenoktsü lemozüksüba shia lir.

Iba maparen kübok Centre-i battalion amenoktsü atema khen

atema Rs 50 crore agütsütsü. Iba dak alia infrastructure creation aser ali atema Rs 30 crore agütsütsü imlar.

Iba battalion amenoktsü mulunga agizükba anogo nungi tenzüker küm ana tsüngda battalion atema recruitment process tembangtsüla ta ketdangsürtemi ashi.

Iba maparen ya Additional Director General (ADG) jenjang nung ketdangsür kati anir recruitment board kati repringtsüla ta ketdangsürtemisa metetdaksüogo.

India Reserve Battalion asünung Centre-i state adena orr tangalen security maparen asoshi mapa lemozüksütsü akok.

Tesüiba nung Tripura sorkari direct recruitment ajanga tetsür dena constables 916 anioktsü sentong aliba metetdaksüogo.

Tripura nung Tripura State Rifles (TSR) aser India Reserve battalions aika amenoka lir. Battalions ji 15th level tashi liasü saka tesüiba nung unit ana shibangtsüogo aser tang all-women battalion ka dena active battalions 13 lir.



Athena Behavioral Health-i Northeast India nung mezüngbuba integrated private psychiatric hospital tulutiba Guwahati nung lapokogo aser ibaji Mental Health Awareness Month nung lir. National Mental Health Survey (NMHS) ajanga Assam nung nütsüing yongsük 8% jungnüa mental health morbidity ajurur aser ibaji nisung 12 shia nung nisung 1 lir. Iba jagi Athena Behavioral Health-i iba hospital lapoker ta Founder & CEO Dr Shradha Malik-i ashi.

WHO-i DR Congo, Uganda nung Ebola tashidak 'global health emergency' sangdong



Geneva, Monupii/May 17 (Agencies): Democratic Republic of the Congo aser Uganda nung Ebola tashidak jatetba ajanga nisung 300 dak tema menepa nisung 88 astüba sülen World Health Organization (WHO)-i iba ya "public health emergency of international concern" ta sangdongogo.

Deobarnü social media post ka nung, iba tashidak jateta aliba ya pandemic emergency sangdongtsübo metemsü saka kidanger linüktem nung prokshia aotsü mela-melar, ta WGO Director-General Tedros Adhanom Ghebreyesus-i ashi.

Tang pokteta aliba ya Bundibugyo virus disease (BVD) ajanga lir ta health ketdangsür temi jangjaogo, koba Ebola tashidak sernung tapu balaka aser iba atema therapeutics mesüra vaccines mali.

DR Congo aser Uganda nung Ebola tashidak 20 ben dak tema pokteta liaka BVD ajanga tenzükbabo tang agi asemen buba ang alitsü.

Mezüng samples bendenba nung positivity rate kanga aika aser suspected cases timba akumba ajanga iba tashidak poktetba ya kanga agi tuluba

alitsü ta WHO-i ashir.

Item cases ya kidanger linük, Uganda nung ana aser tenünga ajak DR Congo nung lir, ta WHO-i ashi.

Ketdangsür temi iba virus mezüng poktetba ya Hokolbarnü DR Congo anüdoklen Ituri province nung jangjateta liasü, koba Uganda aser South Sudan anasa lir. Honibarnü Africa Centres for Disease Control and Prevention (ACDCP) ajanga suspected cases 336 aser tasüba 87 lir ta ashi.

Iba sülen Deobarnü laboratory ajanga DR Congo kübok Goma yimti nung case ka jangjatet, koba Rwanda-i yariba M23 telungpur kübok lir, ta health ketdangsür temi ashi.

"Laboratory nung tendangba nung positive case ka Goma nung jangjatetogo. Ibai Bunia nung Ebola agi asüba nisung ka kinungtsü lir, shiba la kinungbo asüba sülen iba tashidak agi menepa Goma-i ao," ta Professor Jean-Jacques Muyembe, director, Congolese National Institute for Biomedical Research (INRB) ajanga osangbener dang ashi.

Honibarnü Uganda nung case ka jangjaogo, koba DR Congo nungi aruba lir ta ashi

aser iba nisung ya linük yimtiba Kampala nung aliba mozüki ka nung asü, ta ashi. Iba sülen WHO-i case tanabuba Kampala nung jangjatet, saka cases ana ya sendaktepa mali aser tenaprong DR Congo-i oa liasü ta ashi.

DR Congo aser Uganda nung iba tashidak poktetba ya kidanger linüktem asoshi tebilemtsü lir, anungji linük balalai national disaster aser emergency management mechanisms mera agitsüla, arütsü aser tongtipang lenmangtem nung screening alitsüla, ta United Nations health agency ajanga ashir.

WHO-i tejangja cases tem isolation nung ayutsü, aser anogo 21 tashi senzusempongba nokdangtsü ayongzüik.

Ajisüaka parnoki linük balala dang arütsü meshibangtsü mesüra senzusempongba aser shishilempaba menokdangtsü ayongzüik.

Iba virus yagi temang metar, ayanger, saksü-pokshir aser tashidak agi menepa alir temang nungi aliba tzü nung kongshiba, osetsüset tamajung mesüra iba tashidak agi sür alir dak kongshiba nungi menar, ta ACDCP ajanga ashir.

Ukraine-i drone amshia maneni Russia amak; nisung 4 tepsetogo

Moscow, Monupii/May 17 (Agencies): Ukraine-i drone amshia Russia amakba sülen Moscow region nung nisung asem tepsetba densema nisung pezü tepsetogo. Ukraine-i küm ka tsünga Russia yimtiba tang tesashiba makogo, ta local ketdangsürtemi metetdaksü.

Nisung pezübuba ya Ukraine den arrtsü nung aliba Belgorod tesem nung tepseta liasü, ta local ketdangsürtemi ashiba den Russia defence ministry-i anogo tom tashi nung Ukraine-i yokba 1000 dak tema khazüka yokogo, ta ashi.

Russia-i drone aser missile amshia anogo ana tsünga Kyiv tesashitba amakba sülen Ukraine tir Volodymyr Zelenskiy-i Hokolbarnü telangzüba tapet agütsütsü ta shir liasü.

Item tesemtem amakba indang jangjashija Zelenskiy-i X

nung drone ka yima aoba, tesem ka nung mokozü tanak adokba aser mibenertemi mi abentsü merangba video ka lemsatapa liasü.

Paisa, Ukraine-i Moscow temeket nung Russian air defence kanga junga liaka parnoki arrtsü nungi km 500 dak tema pilar aliba target tem dak kashiogo, ta ashi.

"Onoki Russia nungertem dang par state-i rara ya anentsüla ta ashir," ta pai ashi.

Kasa mapang nung civilian tem dak rangloker jenjang agiba atema Russia foreign minister-i Kyiv aitsüogo.

"Eurovision ken tetemdak nung EU-i senotsü teyari agüja Kyiv-i kiralongrar maparen ka inyakogo," ta ministry otongdar Maria Zakharova-i ashiba TASS news agency-i metetdakja liasü.

Civilian tem amakba dak

sendakba nung linük anapronglai kati ka dak tai tongloksütepa arudar.

Hopta ishika tsünga Ukraine-i arrtsü nungi talangka adena or Russia nung tesem balala maka arudar. Parnoki oil refineries, depot aser pipeline tem raksatsütsü atema jenjang agidar. Linük anapronglai kati ka indang infrastructure tem raksatsütsü merangdar.

Moscow Mayor Sergei Sobyenin-i ashiba agi, air defence temi Moscow amaktsü aruba drone 81 raksatsüogo, koba küm ka dak tema nung linük yimtiba tesashitba amakba lir.

Sobyenin-isa, ki asem raksatsüogo aser nisung 12 yiruogo, shirnok Moscow indang oil refinery anasa alirtem liasü, ajisüaka refinery nung technology bo meraksa, ta shisem.

Office of the
LIONS CLUB LONGSA
TENÜNGSANG AGÜTSÜR

Wb. Sangyumanen aser Wt. Temjenkala na jabaso **Wb. Tinumayang-i** NSSB tatidang nung Department of Treasuries and Accounts kübok Junior Accounts Assistant (JAA) mapa ngutetba asoshi Club sangeri tenüngsang tetushi agütsür. Tsüngremi maneni nü taküm aser wadang ajak nung moajangma ta sarasademtsür.

Sd/-
Merentoba
President



Sd/-
Toshi Jamir
Secretary

Drone agi Abu Dhabi nuclear power plant amak

Abu Dhabi, Monupii/May 17 (Agencies): Abu Dhabi nung aliba Barakah Nuclear Power Plant nung Deobarnü drone kati amakba sülen mi adok, ta ketdangsür temi ashi. Ketdangsür temi nisung yiruba mali aser radiation levels nung mokongshi ta ashir.

"Al Dhafra Region nung aliba Barakah Nuclear Power Plant nung drone kati amakba ajanga iba plant indang inner perimeter temalen electrical generator nung mi adokba ajanga Abu Dhabi ketdangsürtemi langzüa liasü," ta Abu Dhabi Medical Office ajanga social media post ka nung ashi.

"Nisung yiruba mali aser radiological safety levels nung kongshiba mali."

Iba mo yagi power plant mesüra tongtipang systems nung mokongshi, ta Federal Authority for Nuclear Regulation (FANR)-i ashi. Units ajanga akhi ama mapa inyaker.

Tang rara aliba aser taoba ita nungi ceasefire ka liaka iba

lendong ya ataloker.

UAE ya Gulf nung US tembar tajung ka lir aser Israel den tesendaktep aliba Arab linüktem rongnung ka lir, aser US-Israel nati February ita tatemlen nungi Iran amakba sülen Iran-i aiben missile aser drone amshia maka arur.

Anogo ishika tejekdang Iran-i iba linük amakba kuli agütsütsü merangba UAE-i magizük. Minister of State Khalifa bin Shaheen Al Marar-i, timtem agütsür den raratsü UAE dak temeden lir aser onok kumzüka ayutsü linük kata tanga teyari memeshir aser ozü temeden kumzüka ayutsü tashi lir, ta shia liasü.

New Delhi nung BRICS senden amendang, UAE ya iba rara nung teyakyak shilem agir, ta Iran indang foreign minister-i aitsüba Abu Dhabi-i magizük aser ibai rara mesürba lir ta ashi.

Rara tenzüker Tehran-i linük aser region nung tangar dak missile aser drone 3,000 shi agi makogo, ta UAE ketdangsür temi ashir.

Islamist temi Nigerian military school ka amak

Abuja, Monupii/May 17 (Agencies): Nigeria northeast len Yobe state nung Islamist telungpurtemi asütsü ta temulung melemi bilemertemi police officer tem training agiba specialised military school ka maka police office 17 tepsetogo, ta national police otongdar-i Honibarnü aonung ashi.

Nigeria kübok northeast nung aliba tesemtem ya küm 18 dak tema Islamist telungpurtemi kanga timtem agüja arudar.

Kasa mapang nung Honibarnü U.S. aser Nigeria nung sepaitem longjemer Northeast küboksa Lake Chad Basin meita aoba mapang alima ajanga nung ISIS second in command tepsetogo, ta US tir Donald Trump aser Nigeria tir Bola Ahmed Tinubu nati metetdaksüogo.

Police officer 17 ya Hokolbarnü Yobe state kübok Buni Yadi tesem nung amendaker aliba Nigerian Army Special Forces School amakba mapang tepset, ta police otongdar Anthony Okon Placid-i sangdong ka ajanga metetdaksü.s

"Telungpurtemi sentong kanga junga yanglur tesem balala nungi iba facility amakba mapang Riju nung specialised operational training agia aliba officer tem ya tepsetogo," ta Placid-i ashi.

Paisa, sepaitema aika tepsetogo ta ashi, ajisüaka osang tejangja magütsü. Ken o dak sendakba nung Nigeria military-i osang tejangja magütsü.

2009 küm Boko Haram pur temai adokba sülen Nigeria kübok northeast nung azütokshi tenzüka liasü. Mapang tatsüka lir iba telok ya lemdang aser Islamic State West Africa Province tenteta liasü, shirnoki military base aser security personnel tem maka arudar.

U.S. aser Nigeria na longjemer meita aoba mapang Abu-Bilal al-Minuki tepsetba ya Trump aser Tinubu nati metetdaksüogo. Pa ya ISWAP indang commander tejen ka liasü.

K i r a l o n g r a r t e m i amokmerenba azioktsü atema Nigeria sorkari specialised military institution tem amenokogo.

All India Police Badminton Cluster nung Nagaland team-i takok tajung angu



Dimapur, Monupii/May 17 (TYO): Lucknow, Uttar Pradesh nung May 9 nungi 13 nü tashi 2buba All India Police Badminton Cluster (Badminton & Table Tennis) 2026 nung shilem agitsü atema Nagaland Police team nung asayar 12 May 7 nü apusoa ao.

Anogo pongu asayaba iba asayamung nung Nagaland Police team-i kanga junga asaya-a gold medal 8, silver 2 aser bronze medal 2 ngua liasü.

Asayamung nung medal timtiba anguba team rongnung Nagaland team pezübuba nung liasü.

Joseph Sumi, NPS shiba Nagaland Police Sports officer lir pai GO Open tebur kija asaya, GO 45+ tebur kija asaya aser GO Open tebur tarep

asaya nung gold medal ngua liasü.

Nagaland team-i item category tem nung takok angu:

Badminton

Joseph Sumi- Go Open tebur kija asaya- Gold medal

Joseph Sumi- Go 45+ tebur kija asaya- Gold medal

Joseph Sumi & Emmanule Shohe- Go Open tebur tarep asaya- Gold medal

Dr. Sentinuklu & Vesuzolo Swuro- Go Open tebur tarep asaya- Silver medal

Tajenkaba- Non Go 45+ tebur kija asaya- Bronze medal

Tajenkaba & Raju Chetri- Non Go 45+ tebur tarep asaya- Bronze medal

Tajenkaba & Imlirenla- Non Go 45+ XD Silver medal

Imlirenla- Non Go 45+

tetsür kija asaya- Gold medal

Imlirenla & Uma Tamang- Non Go 45+ tebur tarep asaya- Gold medal

Uma Tamang- Non Go 45+ tebur kija asaya Gold medal

Bendangnaro & Uma Tamang- Non Go 45+ tebur tarep asaya Gold medal

Bendangnaro- Non Go 35+ tebur kija asaya- Gold medal.

Maneni Nagaland Police Badminton Team-isa, parnok iba asayamung nung shilem agitsü atema temelaba agütsüba atema Rupin Sharma, IPS Director General of Police, Nagaland, James Kinghen, IPS DIGP (Trg) aser Camp Commandant, Shri Ben Longkumer, NPS CO NAPTC nung dang kanga pelaba lemsatepogo.

Sardar Azmoun Iran Wold Cup squad nung mali



Monupii/May 17, 2026 (Agencies): Asayar tejen Sardar Azmoun Iran indang preliminary World Cup squad nung züngoksema mali. US-Iran nati Iran amakba dak sendakba nung sorkari maginütsüsa inyakba atema Azmoun ya national team nungi mintok, aser pa Honibarnü asayar 30 tenüng sangdongba nung densema mali

Arishi küm 31 tain striker shiba United Arab Emirates nung Dubai indang Shabab Al-Ahli nungi asayar, pai March ita Instagram nung Dubai yimsüsür Mohammed bin Rashid den ajurutepba noksa ka lemsatepba sülen Iran nung ketdangsürtem mepeladaksüi liasü, ta Iran nung media sangdong balala ajanga metetdaksü.

Fars News Agency

sangdong ka ajanga March ita ashiba agi, "national team nungi source kati ashiba agi Azmoun squad nungi mintokogo. Iba sülen asayar yagi noksa ya agin saka Iran state TV nung pa maneni aija liasü.

Azmoun-i linük tenüng nungi 91 ben asayaba mapang goal 57 idaksür lir, aser pa taoba World Cup ana tashi nung Iran team nungi asayaogo.

World Cup nung Iran team forward asayartem ya Mehdi Taremi-i anir asayatsü, shiba Europe nung tongtibang league tem nung asayaogo aser tang Greek football nung Olympiacos FC nungi asayar.

Asayar 30 ya Hombarnü Turkiye-i training camp ka, friendly asayatsü aser visa inyakyim tembanga inyaktsü atema aotsü. Iba sülen parnok

United States-i aotsü, ta coach Amir Chalenoie-i metetdaksü.

Squad ya asüngtetsüshia June 1 nü tashi nung World Cup atema asayar 26 dang shimtsü.

Antalya nung friendly anabosa asayatsü Iran timla lir. Parnok Gambia den May 29 nü asayatsü jagjaogo, ta Sam Mehdizadeh-i ashi.

Iran squad aser support staff tem nem World Cup atema tang tashi visa agüja mali, saka FIFA-i June 11 nü asayamung metenzük tsüngda parnok nem visa agütsütsü ta tenangzüba agütsüogo.

"Tang tashi visa agüja mali," ta Iran football federation tir Mehdi Taj-i Brehostibarnü sangdong ka ajanga metetdaksü.

Taj-i ashiba agi, asayartem Turkiye nung fingerprinting asütsü, saka visa inyakyim atema Antalya nungi Turkish yimtiba Ankara tashi km 450 aotsü aliba paitoktsü imla atadar, ta Taj-isa shisema.

Iran team World Cup nung mezüngbuba asaya New Zealand den Los Angeles nung June 15 asayatsü aser iba sülen kasa yimti nung Belgium den asayatsü aser Egypt den Seattle nung asayatsü.

Xabi Alonso Chelsea manager kümogo

Monupii/May 17, 2026 (Agencies): Chelsea manager asütsü atema Xabi Alonso shimogo, ta Premier League ??club yagi sangdong ka ajanga metetdaksü. Spain nung coach yagi küm asem atema tenangzüktepba yangluogo, koba July 1 nü tenzüksü.

"Chelsea ya alima nung football club tulutiba rongnung ka lir aser iba club indang manager akümba atema kanga nema adanger," ta Alonso-i Deobarnü ashi.

Taoba mapang Real Madrid aser Bayer Leverkusen manager ya, Chelsea kibur BlueCo ownership kübok Graham Potter, Mauricio Pochettino, Enzo Maresca aser Liam Rosenior nung sülen permanent manager pongububa kümogo.

Iba ajanga pa English football-i tanaben meyipa aruogo, shiba Liverpool nungi asayar ka ama asaya 210 nung asayaba sülen 2009 küm Real Madrid-i ao aser pa indang career Bayern Munich nung asaya aliba mapang 2017 küm tembang.

"Kibur den aser club nung lenirtem den sensaksemba sülen onok nükjidong kasa dang asüba jangjaogo," ta Alonso-isa shisem.

"Temaba jenjang nung seplasepshi mesüi asayaba aser takok marok atema toktepa asayaba team ka onoki yangluner.

"Squad nung sempet aketba asayartem lir aser iba football club yagi takok aika ngutetsü aser iba club anitsüba ya kü atema jangrademtsüka asütsü. Tang meranga inyaktsü, inyakyim shitak benoktsü aser takok marok angutsü atema rangloker inyaktsü," ta pai ashi.

Chelsea puri tang asaya aliba season junga masayartet aser parnok Premier League nung tekububai asepzüka luogo aser Honibarnü FA Cup final nung Manchester City makokba sülen Europe nung asayamung atema-a qualify mesütet.

"Tebur team manager asütsü atema Xabi Alonso shimba Chelsea Football Club-i pelashishia sangdonger," ta Chelsea-i sangdong ka ajanga metetdaksü.

Bruno Fernandes-i otsü tasen ka yangluogo



Premier League season ka nung goal timtiba assist sütsür aliba asayartem:

Bruno Fernandes- 2025-26- Manchester United- 20

Kevin De Bruyne- 2019-20- Manchester City- 20

Thierry Henry- 2002-03- Arsenal- 20

Mohamed Salah- 2024-25- Liverpool- 18

Kevin De Bruyne- 2016-17- Manchester City- 18

Mesut Özil- 2015-16- Arsenal- 18

Cesc Fàbregas- 2014-15- Chelsea- 18

Frank Lampard- 2004-05- Chelsea- 18

Cesc Fàbregas- 2007-08- Arsenal- 17

Kevin De Bruyne- 2022-23- Manchester City- 16

Monupii/May 17, 2026 (Agencies): Manchester United captain Bruno Fernandes-i Deobarnü otsü tasen ka yanglua pa ya club nungi Premier League season ka nung assist timtiba sütsüba asayar kümogo, aser Premier League season ka nung assist 20 sütsüba asayar tasembuba kümogo.

Pa ya Arsenal forward Thierry Henry aser Manchester City nungi midfielder Kevin De Bruyne na den kasa kümogo. Nottingham Forest den asayaba mapang Bryan Mbeumo nem ball tajung ka agüja goal idaksüba sülen pai iba alizüng tongteta liasü.

Fernandes-i assist record yanglutsü atema maongka angu, saka magitet. Iba asaya ya United-i goal 3-2 agi kokogo. Minute 90 majung tsüngda Joshua Zirkzee-i goal idaksütsü asoshi maogka anguba ka magitet aser Diogo Dalot-i post nung ball metsüloka liasü.

BILEMDANGANG

"Temeim aser taochi nem na anidakjang."